

FRAMKVÆMDARÁKVÖRÐUN FRAMKVÆMDASTJÓRNARINNAR

2013/EES/37/39

frá 17. september 2012

um viðurkenningu á Egyptalandi samkvæmt tilskipun Evrópuþingsins og ráðsins 2008/106/EB að því er varðar kerfi fyrir þjálfun og útgáfu skírteina farmanna (*)

(tilkynnt með númeri C(2012) 6297)

(2012/505/ESB)

FRAMKVÆMDASTJÓRN EVRÓPUSAMBANDSINS
HEFUR,

með hliðsjón af sáttmálanum um starfshætti Evrópusambandsins,

með hliðsjón af tilskipun Evrópuþingsins og ráðsins 2008/106/EB frá 19. nóvember 2008 um lágmarksþjálfun sjómanna⁽¹⁾, einkum fyrstu undirgrein 3. mgr. 19. gr.,

með hliðsjón af beiðnum frá Kýpur, 13. maí 2005, Bretlandi, 25. september 2006, og Grikklandi, 26. október 2006,

og að teknu tilliti til eftirfarandi:

- 1) Samkvæmt tilskipun 2008/106/EB geta aðildarríkin ákveðið að árita viðeigandi skírteini farmanna, sem eru gefin út í þriðju löndum, að því tilskildu að framkvæmdastjórnin viðurkenni viðkomandi þriðja land. Þriðju löndin verða að uppfylla allar kröfur samþykktar Alþjóðasiglingamálastofnunarinnar (IMO) frá 1978 um menntun og þjálfun, skírteini og vaktstöður sjómanna (STCW-samþykktin)⁽²⁾, eins og henni var breytt 1995, sem Alþjóðasiglingamálastofnunin hefur samþykkt.
- 2) Beiðnir um viðurkenningu á Egyptalandi hafa verið lagðar fram bréflaga, 13. maí 2005 af hálfu yfirvalda á Kýpur, 25. september 2006 af hálfu yfirvalda á Bretlandi og 26. október 2006 af hálfu yfirvalda í Grikklandi. Framkvæmdastjórnin hefur, í kjölfar þessara beiðna, metið kerfi fyrir þjálfun og útgáfu skírteina farmanna í Egyptalandi til þess að ganga úr skugga um hvort landið fari að öllum kröfum STCW-samþykktarinnar og hvort viðeigandi ráðstafanir hafi verið gerðar til að koma í veg fyrir svik í tengslum við skírteini. Matið var byggt á niðurstöðum skoðunar sérfræðinga á vegum Siglingaöryggisstofnunar Evrópu í desember 2006. Við þá skoðun komu í ljós tilteknir annmarkar á kerfum fyrir þjálfun og skírteinisútgáfu.
- 3) Framkvæmdastjórnin lét aðildarríkjunum í té skýrslu um niðurstöður matsins.

- 4) Framkvæmdastjórnin fór fram á það bréflaga, 16. febrúar 2009, 21. september 2010 og 20. desember 2011, að Egyptaland legði fram sönnunargögn sem sýndu að ráðin hefði verið bót á annmörkunum sem komu í ljós.
- 5) Yfirvöld í Egyptalandi létu í té umbeðnar upplýsingar bréflaga, 12. nóvember 2009, 25. nóvember 2010 og 28. febrúar 2012, ásamt sönnunargögnum að því er varðar framkvæmd viðeigandi og fullnægjandi aðgerða til að ráða bót á þeim annmörkunum sem komu í ljós við mat á reglufylgni.
- 6) Niðurstaða mats á reglufylgni yfirvalda í Egyptalandi og mats á upplýsingum frá þeim sýnir að Egyptaland uppfyllir viðeigandi kröfur STCW-samþykktarinnar og á sama tíma hefur landið gert viðeigandi ráðstafanir til að koma í veg fyrir svik í tengslum við skírteini.
- 7) Ráðstafanirnar, sem kveðið er á um í þessari ákvörðun, eru í samræmi við álit nefndarinnar um öryggi á höfunum og varnir gegn mengun frá skipum.

SAMÞYKKT ÁKVÖRÐUN ÞESSA:

1. gr.

Egyptaland hefur verið viðurkennt, skv. 19. gr. tilskipunar 2008/106/EB, að því er varðar kerfi fyrir þjálfun og útgáfu skírteina farmanna.

2. gr.

Ákvörðun þessari er beint til aðildarríkjanna.

Gjört í Brussel 17. september 2012.

Fyrir hönd framkvæmdastjórnarinnar,

Siim KALLAS

varaforseti.

(*) Þessi EB-gerð birtist í Stjtið. ESB L 252, 19.9.2012, bls. 57. Hennar var getið í ákvörðun sameiginlegu EES-nefndarinnar nr. 22/2013 frá 1. febrúar 2013 um breytingu á XIII. viðauka (Flutningastarfsemi) sjá EES-viðbætur við Stjórnartíðindi Evrópusambandsins nr. 31, 30.5.2013, bls. 32.

⁽¹⁾ Stjtið. ESB L 323, 3.12.2008, bls. 33.

⁽²⁾ Samþykkt af Alþjóðasiglingamálastofnuninni.